

Exposicion Waldy Simson 20 aña den arte tabata un exito



ORANJESTAD - Bou di bon atencion di publico a tuma luga diasabra 26 di maart pasa den Cas di Cultura e apertura di e exposicion hubileo Waldy Simson 20 aña den arte. Despues di un palabra di bonbini di Lenny Denz, e maestro di ceremonia di e anochi, e coro di hoben Briyante bou guia di Tica Giel, a canta e himno di Aruba.

Cu un manera di canta cu ta parece esun di angelnan e coro, den su prome turno di canta, a canta e canticanan Mijn Dank y Het Lied van Mozes, cu a wordo skirbi dor di Waldy Simson.

Siguiientemente e poeta Belen Kock, kende tambe ta un gran

admirado di Nelson Mandela, a recita e poemanan Aruba, E artista y Speransa na un manera cu a laga lagrimanan sali riba caranan di un parti di e publico presente.

Despues di nan ultimo turno di canta den cua e coro di hoben Briyante a canta En God Zei, Psalm 150 y United We Stand, Divided We Fall, canticanan cu Simson a skirbi, e artista mes a hiba un palabra di gradicimento na publico presente, UNOCA, e artistanan cu a contribui na e apertura di e exposicion, tur amantenan di su arte y na tur esnan cu durante su carera artistico a sostene. Nico Luydens y su coleganan di boekhandel De

Wit en van Dorp, Alejandro Vasques, Junny Hernandez, Nancy Ligeon-Baal, Floor van der Zwan y Mary van Caem tabata esnan prome cu a drenta sala di exposicion paso nan hunto cu Simson lo a inaugura e obra di arte estilo Tiffany Love. Den sentido di tamañonan, 156 x 104 cm, Love, te awo ta e obra di mas grandi cu Simson mag di a traha den su carera artistico. Un poco prome cu e inauguracion di Love publico presente por a scucha e cantica This is it di Michael Jackson.

This is it tabata e cantica cu a inspira Simson masha hopi durante e ultimo parti di su trabou riba Love. E inaugu-

racion di Love tabata e punto culminante di e apertura di e exposicion.

E publico presente, cu tabata hopi impresiona, a ricibi Love, den cua Simson a haci hasta uzo di su propio cabey y tambe de cabey di hende muhe, na un manera hopi bon. E exposicion lo a termina diamars pasa pero hopi lihe, a base di conseho di directiva di Cas di Cultura y di UNOCA, a wordo palabra cu Waldy Simson cu diadomingo pasa lo a bira un extra dia di apertura di e exposicion.

Masha hopi hende a probecha di e extra dia di apertura di e exposicion, cu nan a haya hopi unico y varia. □